


A N F A



NFA, ab alijs Anafra, amplissimum oppidum, à Romanis in Oceani littore extructum, cum omnibus Africæ ciuitatibus situ locique amœnitate certare potest. Planities illi (præterquam in Septentrione, nam ea parte mare respicit) patet in longum octuaginta ferè passuum milibus. Tempia quondam habuit mirificè extructa, officinas complures, palatia insignia: cuius rei facile fidem facient, quæ in hunc vsque diem relicta sunt monumenta. Spatiofi illis fuere horti, è quibus & magna fructuum copia decerpitur, melonum præsertim, ac citrioli: quæ omnia maturitatem medio Aprili attingunt, quare incolæ suos fructus Fessam deferre solent, quod multò citius matura colligantur, quàm Fessæ. Vestitus illis cultus est atque ornatus, fuitque summa eis semper cum Lusitanis, ac cum Anglis consuetudo. Eruditorum hic copiosus est numerus. Verùm duas ob causas huius loci ruinam euenisse volunt. Primò quòd supra modum libertatem ambiebant: secundò, quòd myo-

parones in portu habebant, quibus Gades, atque Lusitanos miris indies vexabant incommodis. Quare tandem Portugalliæ rex classẽ expeditissimam quinquaginta nauium ad eos misit; quæ incolis tantum terroris intulit, vt illi arreptis secum quæ poterant bonis, Rabatum nonnulli, alij Selam confugisse dicantur, hostibus eam urbem depopulandam relinquentes. Qui autem à rege totius classis dux missus erat, fugæ omninò ignarus, suas copias accuratè instruit. Postea verò quæ gesta erant, à quibusdam intellectis, milites in urbem introduxit, quam vnus diei spatio sic vastârunt, domos incendio deleuerunt, atq; muros multis locis solo æquârunt, vt in hunc vsq; diem habitatoribus vacua remanserit. Expugnatum est hoc oppidum Anno salutis M. CCCC. LXVIII.

A Z A A M V R V M



Z A A M V R V M Duccalæ oppidum, Afris conditoribus ad Oceani litus eo ipso loco quo flumen Ommirabih initium habet, extructum: ab Elmadina miliaribus ex Meridie plus minus triginta distat. Spatiofum est atque amplissimum, habitatoribus copiosissimum, familias numerat circiter quinquies mille. Hanc perpetuò Lusitani mercatores habitant. Incolas habet ciuiles, habituque admodum ornatos. Populus in duas diuisus est partes, & tamen perpetua illis pax est. Frugum atque leguminum maxima illis prouenit copia, etsi nihil quicquam horti præter ficus producant. Piscium his tanta est affluentia, vt inde singulis annis aureorum aliquando sexies mille, nonnunquam & septies mille prouentus redeat. Piscandi autem tempus ab Octobri mense, ad finem vsq; Aprilis est. Solent pisces in sartagine cum aliqua olei portione frigere, atque inde tantum pinguedinis colligunt, vt non facile quis credere possit: hanc lychno pensili infundunt, non enim aliud habent huic rei aptum oleum. Huc semel in anno confluunt Lusitani, ac tantam piscium copiam auchunt, vt illi iam dictam enumerent aureorum summam. Hinc factum est, quod Portugalliæ rex, spe prædæ allectus, non semel ad eos classes miserit extructissimas: quarum prior propter ducis imperitiam, in ipso gurgite disiecta, ac propemodum omni ex parte submersa fuit. Post hæc rex ducentarum nauium classẽ expeditissimam misit, qua conspecta tantum intulit ciuibus terrorem, vt omnes in fugam sint redacti, tãta cum portas ingredientium strepitu atq; turba, vt in ea ciuium plusquam octuaginta fuerint interfecti. Anno post Christum natum M. D. XIII. die II. Septembr.

D I V



DIU, veteribus Alambater insula, eiusdemq; nominis pulcherrima & populosa ciuitas ad ostium Indi fluminis in mari Malabarico, Regi ciuitatis & ditioni Cambaia quondam parebat. Sita in fronte sinus Cambaia, Indicum respiciens mare. Quam Christiani nauali prælio, classe 239. nauium, omni armorum genere instructissima, non sine maxima difficultate expugnauerunt. Nam oppidanis rex Cambaia, Adensium, & ciuitatis Calecuti, auxilio fuerunt.

G O A



GOA, vrbs admodum in India potens, in regno Decam prouinciæ Malabar, in insula maris Malabari-ci seu Calecutici sita: de qua plura in indice.